

QVÆSTIO MEDICA.

QVODLIBETARIIS DISPVATIONIBVS MANE DISCVTIENDA

IN SCHOLIS MEDICORVM, DIE IOVIS XI. IANVARII.

M. NICOLAO RAINSSANT, Doctore Medico, Moderatore.

An optimè temperati omnium ingeniosissimi?

QUEMADMODVM anima corporis, sic animæ decus est humana mens, pars illa Princeps, cui regnum totius animi à naturâ tributum est: eam, quia varijs se promit gestionibus, qui sapere perhibentur, in varias distrahère facultates, reuerâ tamen nec ab inuicem, nec ab animi mente, nec ab ipsâmet animâ discrepantes. Hæc enim, dum rem aliquam apprehendit, intellectus; dum ad illam cognitam potiundam sese extendit, voluntas appellatur. Licet autem omnes omnium hominum animæ naturæ dignitate sit pares, eodemque perfectionis gradu contineantur, animorum tam dispar est ac dissimilis ratio, ut alij penè nullo, alij tardo & hebeti, alij non ineleganti, alij summo ac illustri sint ingenio, majorque in animis, quam in corporibus existat diuersitas. Qui nullo labore quidvis sibi cogitatione depingit, difficilia cognitu facile comprehendit, causam inter & effectum prompissimè penetrat, rerum consequentiones videt, similia distinguit, aut, si non habet denotata, retinet assensum, nec vlli vnquam viso assentitur, nisi quod tale fuerit, quale falsum esse non possit, disjuncta coniungit, futura præsentibus copulat, si quid præposterum, confusum, aut falsâ specie se offert, id iudicio tanquam Prætori ventilandum tradit, adhibitaque quâdam veluti manforum ruminatione ad conquirenda consilia, quid in quâque re verum, quid factio opus sit, clarè perspicit, & placide statuit, quod prauum, ac tortuosum est, acie rationis eradit, is certè ingenio ac mente præstare dicendus est, maximè si neque diuinâ luce radiatus, neque disciplinis excultus, neque vsu exercitatus, neque industria altus valet ipse suis viribus.

ANIMA ipsa, ut sit per se diuina, ac suapte naturâ sibi seruiat, sibi imperet, si à corpore absoluat, cum primùm corpori implicatur, nuda & vacua omni re; nec solum ab omni cognitione, sed etiam cognitionis instrumento inops, non potest absque corporeis instrumentis initiari sacris intellectionis. Hujus quippe primordia ducit à sensibus, per quos, ceu per nuncios ac delatores, aut perforatas à sede animi vias, rerum omnium imagines sic à spiritu prætervehuntur ad interiores sensus, ut cum ab ijs insculptis expressâ simulacra considerauit suâque luce collustrauit intellectus, tum demùm se promoueat, ac per eas, quas sibi fabricatur, species, propositas sibi res etiam dissimillimas intelligat, demptis tamen singularis naturæ notis, quæ in phantasmarum inuolucro quasi nube delitescunt. Inest & illi vis quâ à se creatas rerum effigies condit in thesauris suis, & cum in earum sylum ingressus tectas disquirat, obrutas euoluit, importunas amouet, obturbatas digerit, remanisci sibi quæ ipsi præsens esse dicitur. Ne semet quidem intelligere potest, nisi per alia externa seipsum ducat ad se, adeo quasi clauo quodam sensibus affixa mens hæret. Magna quidem in illis veritas, si sani sunt ac valentes, si neque quibusdam veluti præstigijs & captationibus depelluntur ab his quæ clara certaque sunt; neque situs, neque rerum interualla mutantur, contrahuntur, diducuntur; neque vlla res interiecta impedit, quominus percipiant quale quidque sit: in quamvis enim partem faciliè impelluntur, ut qualia illa sunt, quæ animæ obijciuntur, talibus picta fiat interdum alia à seipsâ. Ita paucant Melancholici, quia spiritus atri funt, non anima: neque mens ægrotat, ut voluit Vir alioqui maximus, cum dolorem, quo cruciamur, non sentimus, sed quoniam dolentem ad locum subsidij causâ distracti spiritus facultati, quâ imaginamur, non representantur: ob eam quoque rem sapientes animo ad intima abducto penetralia, quæ palam & ante oculos sunt, non vident. Sic nemper se est: videt, auditque animus, non ex partes, quæ veluti illius fenestæ sunt, quibus tamen sentire nihil potest, nisi id agat & adit.

MAGNI refert quali in corpore locati sit animi, multa siquidem è corpore extant, quæ acuant mentem, multa quæ obdunt: eo quemque valere opus est, ut animo possit, neque magis hic sanus est, quam illud dum in morbo est. Ad ipsius autem corporis administrationem totamque rationem omnium maximi interest, quomodo se habeat spiritus, qui vnus est, & ille æthereus, cuius fulgore cum animus, tum ipsa natura vniuerso collucet corpori. Eo magis nitet, quod sanus, vnde ducitur, purior est ac temperatior: At qui laudabilem & intaminatam semper reponant, admodum paucos reperire est. Sic enim ea, ex quibus constat humanum corpus, inter sese congruere debent, ut sit convenientissima temperies & structura partium omnium, maximè cordis & hepatis, quibus illius elaborandi provincia imposita est: & frustra ex delectis alimentis in ventriculo confectis inchoatur in jecore, recoducque in venis, à corde optimi perfectique sanguinis specie adornatur, nisi statim seposita illius purgamenta partium, quibus id curæ est, robore temperatius, & quâ solet natura, trudentur in corpore. Sed nec satis est nihil superesse impuri, quod vel id peregrinis imbuit qualitatibus, vel suis fumis cor mentis arcem petat: tersum præterea mundum quæ ac meabili delicatiorique texturâ donatum esse oportet viscis illud nobilissimum quo sapimus, & in quo velut in sublimi solio sedens animus sua subiectis quibusque paribus describit officia, præterque commeatum.

LICET temperamentum rectius ex primarum qualitatuum, quàm humorum dominatu æstimeretur, quia tamen ex his, qui Medico elementa sunt prima, conflatur humanum corpus, is vnus, qui in omnium mixtione excellit, definit, denominatur temperamentum: hinc aliud pituitosum, aliud biliosum, aliud sanguineum, aliud melancholicum nominantur. Quemadmodum, vbi ex illis omnibus paribus ferè portionibus quasi iustitiæ ritu temperatis consentanea quadam æqualitas accersitur, exurgit præstans illa temperies, quam qui obtinet, ad munia, ad quæ naturâ suâ ducitur, incorruptè fungenda pulchrè comparatur est. Quid enim eximium ab illis expectes? Pituitosus impensè frigidus, tardis, blennis, plumbeis, mucidis angusti funt sensus, vis animi nulla & quasi nexu quodam impedita, adeo frigore torpent crassi concretique spiritus: minùs tamen absunt à temperie, quàm à mente optimâ. Diceret stiptes qui se hac illucque agant, & præter formam humani sibi nihil referant. Biliosus solo ingenij acumine speciales ferè futuri delicatiorum quæscunt, volaticoque mobiliorem spirituum impetu audaces, temerarij, leues, omnibusque consilijs præcipites ac deuij vix legum & sapientia repagulis continentur, quidvis adoriuntur & degustant, ad vmbilicum perducunt nihil. Sanguinei venustate alijque donibus meritò commendati corpore, cui plurimum indulgent, melius ventur quam mente, à quâ & sæpe & leui de causâ deferuntur. Ad ipsius duplex tantum est ratio, alijs scilicet friger, alijs calet impensè crassipelle corpore. Illi pituitosis haud ingeniosiores, sed morosiores, ac stomachosiores, & tenui sunt corpore & multo tenuiori mente, quæ atri humoris tenebris circumfusa vix vllum seu veritatis seu rationi locum relinquit, amplum mœrori ac metui, quibus confecti sæpe & vitæ desperatione ad laqueum currunt. His contra fidenti, & ob feruidiorem atque vndè sanguinem, quem progignunt, duriori habitu præditis inest robustus furor inimicus sanæ menti. Est tamen vbi toti humoris calore quasi subdita face inflammata viget aliquandiu, aspectusque res claris cernit, sed dementia proxima non benè sibi semper constat, statimque ac illius æstus confedit, relaxatur & concidit. An igitur sic nati ideo ingeniosi sunt habiti, quod ad quamcumque opinionem quasi tempestate delati ad eam tanquam ad saxum pertinaciter adhærescunt, vbiuis pugnacissimè defensuri, & ad quamcumque rem cognoscendam animum adiecere, diu multumque & in omnem partem versant, dum totam è causarum suarum, & obscuritatis inuolucris eruerint? Sæpe autem ingenium & artem vincit assiduis vniue rei deditus vsus.

CVIVS in corpore affines in permissione qualitates, & quâ decet proportionem, quatuor humores sic couerit, optima vt inde efflorescat temperies, sitque mollior cutis, is vnus ex hominum turbâ florebit omnibus ingenij dotibus, cæterisque intelligentiâ anteibit. Nempe cum vires dat melior sanguis, & partes singule plurimorum ac lucidorum spirituum præsidio munitæ vigent, nullaque excrementorum seu retrâ aspiratione seu contagione inficiuntur, expeditas atque ad sua officia alacres promptasque esse oportet facultates omnes, eam maximè quæ Augustissima est & aliarum Regina. In cuius enim integris incorruptisque sensibus & veritas est, & acre semper iudicium, qui ab illis solidas incolumetque rerum, quæ foris funt, effigies quasi futuræ cognitionis semina excipit, spiritu facili, nec vllò caloris turbine actus eas inuehente, quid est quomobrem is non vbiq; suæ sit mentis, præsentique vtatur animo, qui nullo sensuum errore traditus citius ac dilucidius cernat, quidni & à memoriâ Mulsarum matre optimè constitutus sit? Planè vt, cum sudum est, multò melius res perspicitur, quam turbido celo, ac sicut, vbi in speculum ingingit crassior aer, difficilis est eorum, quæ alioqui bellè reddit, obtutus: Sic vbi phantasia leuior ac perpoliti instat speculi rebus externis tractas conceptasque notiones purgatissimas intellectui contemplandas præbet, se hinc excitat erigitque ad agendum, fretusque spiritibus sinceris, subtilibus, splendidis, tenuibus, solertiâ & sagacitate pollet eximiâ, falsum aut incognitum nihil approbat, nec festinanter & citò quasi auguratione quâdam, sed rectâ & perspicaci ratione, inuestigatione accuratâ, aptè ex aliis alia necens & colligens, quasi expleam rerum omnium etiam abstrusorum, admirandarum, diuinarum comprehensionem amplectitur, bonarumque cogitationum ac scientiarum epulis saturatur. Altâ hæc mente, eoque naturæ habitu propè diuino fucere, qui, velut faces publicæ à celo delapsæ, artes disciplinæque omnes excogitant & illustrant. Et qui orbem veritatis luce compleuit, quo pacto reliquos mortales eorum ipse caput, vt erat ad vnguem temperatus, oris specie formæque dignitate, sic ingenij vi ac celsitate longè superauit.

Ergo optimè temperati omnium ingeniosissimi.

DOMINI DOCTORES DISPVATVRI.

M. Edmundus Charrier.
M. Raphaël Maurin.
M. Ludouicus Gallais.

M. Franciscus Gouël.
M. Petrus Crescè.
M. Petrus le Large, Prof. Chirurg.

M. Petrus Bourdelot, Sereniss. Regin. Sueciae Med. prim. & Abbas Massensij.
M. Carolus le Breton.
M. Claudius Perraut.

Proponebat Lutetiæ IACOBVS DE BOVRGES, Parisinus, A. R. S. H. M. DC. LXIII.